

153
 bus suscipiantur, & debita illi obedientia in omnibus conservetur.

III.

Et licet in omnibus id observare velimus, præcipue tamen sancimus, ut in termino Beatorum Petri & Pauli Apostolorum Principum nemo in eundo, & redeundo, vel ibi morando, aliquam vastationem, & depredationem facere præsumat; & quæ ipsius Sanctæ Ecclesiæ propria sunt, nemo aliqua iniqua machinatione, sine voluntate ipsius Sacri Pontificis sibi vindicare præsumat. Quod si quisquam fecerit, restituitis malè præsumtis, immunitatem ipsius Ecclesiæ perfolvat, & bannum nostrum tripliciter componat.

IV.

Ut Ecclesiasticus honor, & Sacerdotalis, atque Clericalis reverentia, debita competentique sinceritatis religione ab omnibus amplectatur, & in omnibus custodiatur, sicut avi & genitoris nostri monent edicta.

V.

Ut Imperialis honor ab omnibus fideliter observetur; & quæ ab eo seu per epistolam seu per legatos præcipiuntur, à nullo impune audeant violari.

VI.

Ut Episcopi ministerium suum, secundum sacros, & à Sancto Spiritu promulgatos Canones peragant; Parochias suas absque aliquo impedimento, prædicando, corrigendo, & confirmando circumeant; & in hoc agendo nullus ei contraire, & quod ad ministerium illorum pertinet contradicere in ipsis Parochiis audeat, vel eis exinde aliquam molestiam inferat; sed adjutor, si oportuerit, invitatus à Pontifice quisque Ecclesiæ filius existat; ut liceat eis criminalia scelera, & alia quæque corrigenda inquirere, discutere & judicare canonicè. Quod qui temerare protervè præsumerit, triplicem legem & triplex bannum nostrum perfolvat.

VII.

Ut Episcopi secundum sacram jussionem Domini Nostri Jesu Christi prædicationem per se, vel per suos congruenter exercent, & Presbyteros suos ut similiter faciunt instruere procurant.

VIII.

Ut Seculares & fideles laici diebus festis, qui in Civitatibus sunt, ad publicas stationes occurrant: & qui in villis & possessionibus sunt, ad publicum officium in Plebem festinent.

IX.

Ut nullus latibulosa Missarum in suis domibus officia celebrare præsumat sine sui rationabili licentia Episcopi.

X.

Ut Episcopi in Civitatibus suis proximum Ecclesiæ claustrum instituunt, in quo ipsi cum Clero secundum Canonicam regulam Deo militant.

XI.

Ut Episcopi Sacerdotes suos ad hoc constringant, ut Ecclesias non relinquunt, & alibi habitare præsumant. Sint etiam subjecti proprio Episcopo secundum Canonicam auctoritatem, nec per contumaciam ab eorum potestate dissiliant. Neque seculari potestati ad hoc eis commendare se liceat, aut eos quilibet recipere audeat, aut contra Canonicas leges, & debitam Episcopi potestatem quodammodo defensentur.

Hujusmodi verò Sacerdotes Episcopalis illico censura disciplinis Ecclesiasticis subdat. Nec fas est omnium eorum sollicitudinem Episcopos non gerere, quibus in committendis sacris Ordinibus dignum visum est communicasse.

XII.

Ut à domibus Sacerdotum, propter malæ opinionis famam, habitatio feminarum penitus tollatur; neque illi in domos illarum intrare indiscretè præsumant, ne nomen Dei, quod absit, per illos blasphemetur, per quos laudari pie & jugiter debet.

XIII.

Venationem quoque nullus tam sacri ordinis exercere præsumat; neque arma militaria pro qualicumque seditione portare audeat, aut habitum quemlibet tantum apicem Sacerdotii non decentem assumat.

XIV.

Ut res Ecclesiasticas tam mobiles, quam & immobiles nemo invadere, vel auferre præsumat; & quæ à Rectoribus Ecclesiæ hætenus, ob timorem vel favorem, alicui libellario, vel emphyteutario jure dolosè, vel cum damni detrimento Ecclesiæ amississè videntur, ad pristinum jus revertantur: quatenus liceat illis, quibus earum cura commissa est, quieto & pacifico ordine eas tenere, & pro nobis, ac regno nobis à Deo commisso orare, pauperibusque debita stipendia erogare, familiam Ecclesiæ justè & rationabiliter regere, & gubernare. Transgressoribus autem indicimus injustè præsumta restituere, & sicut superius præfixum est, triplicem legem, & triplex bannum nostrum perfolvere.

XV.

Ut Ecclesias Baptismales, quas Plebes appellant, secundum antiquam consuetudinem Ecclesiæ filii restaurent.

XVI.

Ut Episcopi Comites & Vassos nostros in Parochia eorum manentes paterno amore secundum Ecclesiasticum ministerium diligant. Ipsi verò Comites & Vassalli, seu reliqua generalitas prædictos Episcopos ut sanctos patres honorent & venerentur. & ad ministerium illorum peragendum, ubicumque potuerint, eos adjuvare decerent. Si verò, quod non optamus, eis infesti, quominus quæ Dei sunt exercere possint, reperti fuerint, aut ipsi contra leges officia sua violaverint, & eos, quos venerari debent, inquietaverint, secundum Capitulare avi & genitoris nostri emendent. Qualiter quoque Presbyteros ac reliquos gradus honorent, ipsius Capitularis forma doceantur. Ipsi nihilominus Episcopi, singuli in suo Episcopo, Missatici nostri potestate & auctoritate fungantur.

XVII.

Ut Episcopi, & Comites in suis ministeriis commorantes in suis consistant domibus cum suis Vassallis, neque præsumant occasionè hospitii in pauperioris cujusdam vicini domo, nisi rogati, commorari; quia ob hoc maxime depredationes & discordias hætenus pullulasse manifestum est. Prævideant quoque, secundum ministerium unusquisque suum, ne in potestate illorum prædæ & devastationes fiant. Et si aliqui hoc facere tentaverint, omni sua virtute illis resistant. Et si ipsi per se contringere illos ad emendationem non potuerint, constitutis Missis nostris renuntiant, ut ipsorum judi-